

of

Yoshlar bandligini ta'minlash
maqsadida ajratilgan kreditlar:

"Mikrokreditbank" dan
182 311 mln. so'm

"Agrobank" dan
399 079,9 mln. so'm

"Xalq banki" dan
189 767,2 mln. so'm

YOSHLAR OVOZI

**BIZ – KELAJAK
BUNYODKORIMIZ!**

Ijtimoiy-siyosiy, iqtisodiy,
adabiy-badiiy
gazeta

29 (16482)
2022-yil, 14-may
shanba

[/yoshlarovozi](#)

[/yoshlarovozi](#)

[/yoshlarovozi.uz](#)

Yoshlar siyosati
4-5-betlar

Respublika komissiyasi
Farg'onada

Ta'lim
6-bet

Kredit-modul tizimi: qulaylik,
kamchilik va ustun jihatlari

Nigoh
7-bet

So'z erkinligi
nima?



“BO‘ZATOV FEST” O‘Z KULMINATSIYASIGA YETDI

SUPER FINAL – ERTAGA

batafsil
2-3-betlarda

“BO‘ZATOV FEST” O‘Z KULMINATSIYASIGA YETDI SUPER FINAL – ERTAGA

Jonlijro, xushkayfiyat, hayajon, mag‘lubiyat alami va sevinch sahnasiga aylangan Bo‘zatov bugun baxshichilik, an‘anaviy ijro, opera, estrada yo‘nalishlarida o‘z iste‘dodini namoyish qilayotgan yoshlar bilan limmo-lim. “Bo‘zatov FEST”: “Yoshlar ovozi” tanlovi chin ma‘noda yangi ovozlarni kashf etishga xizmat qilmoqda. Taniqli shoirlar va yosh ijodkorlar uchrashuvi, qoraqalpoq milliy taomlari, hunarmandchilik namunalari va liboslari ko‘rgazmasi, mushakbozlik shousi festivalga yanada ko‘tarinki ruh bag‘ishlayotir.



Munojot YO‘LCHIYEVA,
O‘zbekiston Qahramoni, O‘zbekiston xalq artisti, hakamlar hay‘ati a‘zosi:

– Asrlar osha o‘zbek san‘ati xalqimizning qon-qoniga singib ketgan. Buning isbotini endi bo‘y cho‘zib kelayotgan iqtidorli bolalarimizda ham ko‘rishimiz mumkin. Prezidentimizning tashabbuslari bilan an‘anaviy tarzda o‘tkazilib kelinayotgan “Yoshlar ovozi” tanlovi yosh iqtidorlarning san‘at maydoniga kirib kelishiga zamin bo‘ladi, kelajakda shu yo‘nalishda ijod qilishi uchun katta imkoniyat eishigini ochib, yoshlarimizning o‘ziga bo‘lgan ishonchini oshirishga xizmat qiladi. Mezbon Qoraqalpog‘iston vakillari juda kuchli tayyorgarlik ko‘rishibdi. Ular baxshichilik va opera yo‘nalishlarida oliy o‘rinlar uchun kurashga kirishgan. Farg‘ona, Jizzax, Surxondaryo, Qashqadaryo viloyati yoshlari ham yuqori tayyorgarlik bilan kelishgan.

Biz hakamlar ishtirokchilarni 10 ballik tizimda baholab, yoshlarning ijro mahorati, uslubi, kiyinish madaniyati, ovozi kabilarga ahamiyat qarataymiz.

Baxshichilik, an‘anaviy ijro, opera yo‘nalishi bo‘yicha tanlovlar o‘z nihoyasiga yetdi. Ayniqsa, noyob nomoddiy madaniy merosimiz, yer yuzida kamdan-kam xalqlarda mavjud bo‘lib, necha ming yillar osha bizgacha beza-vo saqlanib, yetib kelgan baxshichilik yo‘nalishidagi bellashuv qizg‘in kechdi. Ilgari baxshi deganda katta yoshli, doston aytadigan kishilar ko‘z oldimizga kelardi. Bu yilgi tanlovda esa yosh-yosh yigitlar, hattoki qizlar ham do‘mbira chertib, doston va temalarni baralla kuylashmoqda.



“Yoshlar ovozi” bu yil ikkinchi marotaba o‘tkazilmoqda. 2021-yilda 10 ming, bu yil esa 238 ming yoshning ishtiroki tanlovga qiziqishning keskin oshganidan dalolat. O‘tgan yili tanlov hududiy kasting bosqichidan boshlangan va bu ko‘plab iste‘dod egalarni kashf etish imkonini bermagandi. Bu yil quyi bo‘g‘indan har bir yoshning ovozi eishitish maqsad qilingan.

O‘tgan yili tanlov 2 yosh toifasida (6-15 yosh, 16-30 yosh), 3 ta yo‘nalishda (an‘anaviy ijro va baxshichilik, opera hamda estrada) o‘tkazilgan. O‘z navbatida ishtirokchilar o‘rtasida yosh mutanosibligini keltirib chiqargani bois bu yil tanlovda 10 yoshdan 30 yoshgacha bo‘lgan yoshlar 3 yosh toifasida (10-15, 16-22 va 23-30 yosh) baxshichilik, an‘anaviy ijro (maqom, katta ashula, suvoraxonlik), opera hamda estrada kabi 4 ta yo‘nalishning birida ishtirok etishlari belgilandi.

Bundan tashqari, o‘tgan yili 1-o‘ringa 50 million, 2-o‘ringa 25 million hamda 3-o‘ringa 15 million so‘m miqdordagi pul mukofoti berilgan. Shuningdek, respublika bosqichiga chiqqan qolgan ishtirokchilarni rag‘batlantirish maqsadida 5 million so‘mdan ajratilgan edi. Bu yil esa jamg‘arma miqdori o‘zgar-gan bo‘lib, har bir yo‘nalish bo‘yicha 1-o‘rin egasi 50 million, 2- va 3-o‘rin sovrindorlari 30 million hamda 20 million so‘m pul mukofotini qo‘lga kiritishadi. Qolgan respublika bosqichi qatnashchilari esa 10 million so‘m bilan taqdirlanadi.

Nizomga ko‘ra, tanlov ikki bosqichda – final va super final shaklida bo‘lib o‘tadi. Finalda eng yuqori balni qo‘lga kiritgan 4 ishtirokchi super finalga yo‘l oladi. Bu bosqichda hakamlar tomonidan berilgan qo‘shimcha shart asosida 3 nafar g‘olib aniqlanadi.

G‘oliblarning nomlari esa Bo‘zatov tumanida bo‘lib o‘tadigan yakuniy gala-konsertda e‘lon qilinadi.



Indira NOLDOROVA,
Yoshlar ishlari agentligi
Besh tashabbus loyihalarini muvofiqlashtirish boshqarmasi boshlig‘i:

– Ishtirokchilar garchi hayajonda bo‘lishsa-da, ularning ko‘zlaridan o‘ziga bo‘lgan ishonchni ko‘rish mumkin. Yoshlarimizning fikri bilan qiziqqanimizda ular bu tanlovdan nihoyatda mamnun ekanliklarini, hech kim bu yerdan quruq ketmasligini ta’kidlashmoqda. Haqiqatan ham, tanlov ishtirokchilari hatto o‘rin ololmagan taqdirda ham ularga 10 million so‘m miqdorida pul mukofoti taqdim etiladi. Eng quvonarlisi, yoshlarimiz san‘atimizning ulug‘ darg‘alari bo‘lmish Munojot Yo‘lchiyeva, Islomjon Jallilov, Shirin Mamatovalarning qimmatli taklif hamda maslahatlariga ega bo‘lmoqda.



Malika AKMALJONOVA,
tanlovning 16-22 yosh toifasida opera yo‘nalishi ishtirokchisi (Samarqand viloyati):

– Tanlov tashkilotchilari tomonidan festival doirasida diqqatga sazovor joylarga uyushtirilgan sayohat ham bizda katta taassurot qoldirdi. Borgan joylarimiz orasida “Sovetskiy” muzeyi haqida ko‘p bor eishitgan, o‘qigan edim, ammo ko‘rganlarim eishitganlarimdan ham o‘zga bir manzara bo‘ldi. Ekspонатlar odamni hayratlantiradi. Yurtimiz zaminida shunday madaniyat va san‘at markazi borligi kishida faxr uyg‘atadi. Men bu tanlovda birinchi bor ishtirok etyapman. Ijodkor insonlar bilan tanishdim, davra suhbatlarida bo‘ldim. Har doim sahnaga chiqish oldidan hayajon bo‘lardi. Bu galgi chiqishim oldidan hayajon ikki karra ko‘proq bo‘ldi. Ammo ustozlarimning menga bergan maslahatlari, yo‘l-yo‘riqlari bilan ushbu hayajonni yenga oldim deb o‘ylayman. Ovoz va nafasni to‘g‘rilab, chiroyli talqinda kuylashga harakat qildim, bu hakamlar hay‘atiga ma‘qul keldi va super finalga chiqishga muvaffaq bo‘ldim.

66

1-O‘RIN EGASI 50 MILLION, 2- VA 3-O‘RIN SOVRINDORLARI 30 MILLION HAMDA 20 MILLION SO‘M PUL MUKOFOTINI QO‘LGA KIRITISHADI.

66

BU YIL TANLOV ENG QUIYI, YA'NI MAHALLA BOSQICHIDAN BOSHLANDI. O'TGAN YILGIGA NISBATAN BU YIL TALABGORLAR SONI SEZILARLI DARAJADA OSHGAN.



Sayyora SULTONOVA,
23–30 yosh toifasida baxshichilik yo'nalishi
ishtirokchisi (Namangan viloyati):

– Ko'pchilik mendan qiz bola bo'lishimga qaramay, nega aynan baxshichilik yo'nalishini tanlaganimni so'rashadi. Uch yoshimdan Shomurod baxshi Tog'ayevning "Biyigul" termasini hirgoyi qilib yurardim. Keyinchalik bu soha bilan jiddiy shugullanishimga onam sababchi bo'lganlar. Bilamizki, "Yoshlar ovozi" bu yil ikkinchi marotaba o'tkazilyapti. Bu yilgi festival ajoyib tarzda tashkillashtirilgan. O'tgan yili tanlov to'g'ridan-to'g'ri viloyat bosqichidan boshlangani uchun chekka hududlardagi yoshlar qatnasha olmagandi. Bu yil esa tanlov eng quyi, ya'ni mahalla bosqichidan boshlandi. O'tgan yilgiga nisbatan bu yil talabgorlar soni sezilarli darajada oshgan. Bu esa eng kichik hududlardan boshlab iste'dodlarni kashf etishga yordam beradi. Ushbu festivaldan olgan taassurotlarim juda katta, bu ishtirok menga ko'p tajribalar berdi.



Shahlo ABDUSAIDOVA,
"Yoshlar ovozi" respublika tanlovi Media
shtabi mas'uli:

– O'tgan yili tanlov Nukus shahridagi uchta obyektida yo'nalishlar kesimida bo'lib o'tgan bo'lsa, bu yil barcha ishtirokchilar pavilondagi sahnaga ko'tarilishmoqda. Har kuni bittadan yo'nalishda bahslar bo'lib o'tmoqda. Tanlov televidion formatda tasvirga olinyapti. Hakamlar sahnaga ko'tarilgan har bir ishtirokchi bilan ijrosidan so'ng suhbat qilib, kerakli joylarda ularga tavsiya berishmoqda. Albatta, ustozlarning maslahatlari, tavsiyalari ularning kelgusi ijod faoliyatida asqotadi.

Tanlovning mahalla bosqichidan boshlab ijodiy guruhimiz bilan televideniye, saytlar, gazetalar orqali yoritishni boshladik. Bu jarayonlar tanlovning keyingi bosqichlarida sektor, tuman (shahar) hamda hududiy bosqichlarda ham davom etdi. Voqealar rivoji to'g'ridan-to'g'ri jonli efirlar, ko'rsatuvlar orqali uzatilib, yurtdoshlarimizni xabarador etib bormoqda. Bo'zatov iqtidorlarni kashf etishda davom etaveradi. Biz esa yangi-yangi ovoz egalari yoritishdan charchamaymiz.



Firdavs SUYUNOV,
16–22 yosh toifasida baxshichilik yo'nalishi
ishtirokchisi (Samarqand viloyati):

– Men Samarqand viloyati nomidan qatnashdim, boshqa viloyatlardan kelgan raqiblarimning ham imkoniyat darajasi keng. Ayniqsa, baxshichilik yo'nalishida Qashqadaryo va Surxondaryo yoshlari ustunlik qiladi. Chunki bu hududlarda baxshichilik katta tarixga ega. Shunday bo'lsa-da, boshqa hududdan kelgan qatnashchilar ham bor imkoniyatlarini ko'rsatishdi. Men "Alpomish" dostonidan Alpomish onasining hasratlari bayon qilingan qismini ijro etdim. Hakamlar tomonidan yaxshi fikrlar, maslahatlar berildi. Ijroyim ularga yoqdi, hozircha natijalarni kutayapmiz.



**WIKI
STIPENDIYA**

**"WIKI-STIPENDIYA"
MARAFONI E'LON QILINDI**



Wikipedia – bugungi kunda dunyodagi eng yirik ma'lumotlar bazasi. Ochiq internet ensiklopediyasidagi maqolalarning 63 foizi ingliz, 6,9 foizi rus, 4 foizi turk va boshqa tillarda kiritilgan. Afsuski, o'zbek tilidagi maqolalar 0,1 foizdan ham kam ko'rsatkichni tashkil qiladi.

Shu sabab Yoshlar ishlari agentligi hamkor tashkilotlar bilan birgalikda "Wiki-stipendiya" marafonini e'lon qiladi. Bundan asosiy maqsad internet tarmog'ida o'zbek tilidagi foydali ma'lumotlarni ko'paytirishdan iborat.

G'oliblar: 1-o'rin 50 million so'm, 2-o'rin 40 million so'm, 3-o'rin 30 million so'm pul mukofotlari bilan taqdirlanadi. Bundan tashqari, eng faol beshtalikning har biriga 20 million so'm, eng faol o'ntalikning har biriga esa 10 million so'mlik bir martalik stipendiya beriladi.

Marafon shu yilning 20-maydan 20-dekabrigacha o'tkaziladi. Marafonda ishtirok etish uchun [@Wikistipendiya_bot](#) telegram boti orqali ro'yxatdan o'tish lozim.

Lobar QODIROVA

RESPUBLIKA KOMISSIYASI FARG'ONADA



Avvallari u yer-bu yerdan kunlik ish topib, nasibam shu ekan, deb yurgan yoshlar mahalladagi yoshlar yetakchisi uyma-uy kirib, xatlovdan o'tkazgach, tayin ish o'rniga ega bo'lmoqda. Mahalladagi ishsiz yoshlarga bir nechta ish taklif qilinib, qiziqishlari bo'yicha pazandachilik, dehqonchilik, bog'dorchilik, tikuvchilik, hunarmandchilik kabi sohalarga yo'naltirilmogda.

SHunday yoshlardan biri **Qo'shtepa tumanidagi "Yo'ldoshobod" mahallasidan Mahmudjon Jamolov.** Unga uch oy oldin mahalla yoshlar yetakchisi subsidiya asosida inkubator olib bergandi. Mahmudjon shuning ortidan 2,5 million so'm sof daromad oldi.

Bunday yoshlar respublikada minglab topiladi. Ajratilayotgan ko'maklar haqiqiy muhtojlarga yetib borishida esa yoshlar yetakchisidan katta mas'uliyat va vijdonan yondashuv talab qilinadi.

Bugun viloyatlarda haqiqiy ahvol qanday? Yoshlar yetakchilari faoliyatida qanday muammolarga duch kelmoqda? Shu kabi savollarga javob olish maqsadida Mahallalarda yoshlar bilan ishlash masalalarini muvofiqlashtirish bo'yicha respublika komissiyasi a'zolari Farg'ona viloyatida bo'lib turibdi.

O'tgan vaqt davomida viloyatda "Yoshlar daftari"ga kiritilgan 15 ming 376 nafar ijtimoiy himoyaga muhtoj yoshga 9,7 milliard so'm ajratilgan. Ishsiz yoshlarga dehqonchilik qilishi uchun 1 gektargacha yer berish amaliyoti yo'lga qo'yilib, yil boshidan 11 ming 630 nafar yoshga 1 ming 503 gektar yer ajratilgan.



Akmal ALIMOV,
Respublika ishchi guruh a'zosi,
Yoshlar ishlari agentligi
boshqarma boshlig'i:

YOSHLAR YETAKCHILARINING FAOLIYATI MUVOFIQLASHTIRILMOQDA

"BUNDAY MUNOSABATNI KUTMAGANDIM"

Bilib-bilmay jinoyat yo'lga kirib qolgan va qonunda belgilangan tartibda jazoni o'tab qaytgan o'g'il-qizlar bilan ishlash, ularga keyingi hayotini izga tushirishga ko'maklashish, jamiyatda munosib o'rnini topishga yordam berish yetakchilarning yana bir muhim vazifasidir.

MIGRANTLAR HAM QAYTIB KELDI

Ayni kunlarda viloyatning Oltiariq tumani qir-adirliklarida yangi ekin maydonlari o'zlashtirilib, tumandagi "Yoshlar daftari", "Ayollar daftari", "Temir daftar"ga ro'yxatga olingan aholiga bo'lib berilmogda. Ishchi guruh a'zolari kun tartibi doirasida mazkur hududga kelib, yer ajratilgan yoshlar bilan suhbatlashdi.



Ulug'bek QOSIMOV,
Qo'shtepa tumanidagi
"Qorajiyda"
mahallasidan:



Faxriddin MAMADALIYEV,
Oltiariq tumanidagi
"Eskiarab" mahallasi
yoshlar yetakchisi:



— Viloyat safarida bo'lib turganimizda, eng avvalo, mahalladagi beshlikning (mahalla raisi, hokim yordamchisi, yoshlar yetakchisi, xotin-qizlar faoli, profilaktika inspektori) hamkorligini yo'lga qo'yishga ahamiyat berdik. Hududdagi yoshlar yetakchilari bilan suhbatlashib, ular yuritayotgan hujjatlarini ko'zdan kechirdik, kamchiliklarni tahlil qildik. Yoshlar yetakchilari va mahalla yoshlarining fikr hamda takliflari tinglandi, ishga joylashgan yoshlar bilan suhbatlar tashkillashtirdik. Joriy yilning 4 oyi davomida viloyatda 1 445 nafar yosh tomonidan 1 466 ta jinoyat sodir qilingan bo'lib, umumiy jinoyatlarning (4 828 ta) har uchinchisida yoshlar ishtirok etgan. Shu bois mahallalarda yoshlar jinoyatchiligining oldini olish bo'yicha "Farg'ona tajribasi"ni yaratish komissiya a'zolarining eng asosiy maqsadi etib belgilab olindi. Jinoyatchilik oshgan Marg'ilon shahri va Yozyovon, Oltiariq tumanlaridagi mahallalarda yoshlar jinoyatchiligi profilaktikasi borasida tanqidiy muhokamalar tashkil etildi.

— O'n olti oy qilmishimdan xulosa chiqarishim uchun yetarli fursat bo'ldi. Qilgan ishimdanda pushaymonman. Endi mahallaga borsam, menga qanday munosabatda bo'lishadi, deb ko'p o'ylandim. Chiqishim bilan mahalla yetakchisi yonimga kelib, qaysi sohani uddalay olishimni so'raganida hayron bo'ldim. Men bunday munosabatni kutmagandim. Ko'p o'tmay mahalladagi g'isht ishlab chiqarish sexiga ishga joylashdim. Hozirda bir milliondan oshiq maosh olyapman.

— Ishchi guruh a'zolari mahallamizga kelib, yangi o'zlashtirilgan mahallamiz yoshlariga 20 sotixdan bo'lib berilgan 1000 gektar yerni ham ko'zdan kechirdi. Bu yerlarni sug'orish uchun katta maydonda suv havzalari yaratildi. Unumdorligi juda yuqori deb baholangan maydon tomchilatib sug'orilmogda. Bo'sh yerlarga tok ko'chatlari ekib berildi. Uzum hosiliga kirguncha poliz ekinlari yetishtirishga sharoit ham qilindi. Hozir tok oralariga tarvuz ekilgan. Bu yangilikdan xabar topgan migrantlarimiz ortiga qaytib, shu yerda daimiy ish topmogda.



AHOLINING ISHONCHI MUHIM EHTIYOJMANDGA UY QURILMOQDA



Sardor QURBONOV,
Beshariq tumanidagi
"Dala-Hamid Olimjon" mahallasi
yoshlar yetakchisi:

— Mahallamizda bir yosh ayolning 4 nafar farzandi bor. U shari' nikh bilan oila qurgani bois farzandlariga tug'ilganlik haqida guvohnoma olovmagan. Yolg'iz ona mahalladan yordam so'rab chiqdi. Lekin biz uni "Yoshlar daftari"ga kiritish tartiblariga to'g'ri kelmagan uchun ro'yxatga qo'sha olmadi. Ishchi guruh a'zolariga meni qiyayotgan shu masalada murojaat qildim. Ular menga, avvalo, xalq manfaatini uchun ishlashimiz kerakligini aytib, hokimiyatga murojaat qilishimni va bu oilaga yordam berishimni aytishdi. Barcha hujjatlarini qonuniy to'g'rilab beringlar, aholining ishonchi biz uchun muhim, bu ishonchni yo'qotmanglar, deb maslahat berdi. Kerak bo'lsa, guvohnomalar olishga ham ko'maklashaymiz.



Elmurodjon ABDURHAMIDOV,
Qo'shtepa tumanidagi
"Yo'ldoshobod" mahallasi
yoshlar yetakchisi:

— Xatlov qilib yurgan paytimda mahallamizdagi bir oilaning uy-joyga muhtoj ekanini, yashab kelayotgan uylari yaroqsiz holga kelib qolganini aniqlagandim. Ko'cha sardorlari bilan kelishib, shu xonadonni hashar yo'li bilan qaytadan qurib berishga maslahat qildik. Hasharni boshlaganimizdan keyin mahallamizda bir qancha homiyilar ham paydo bo'lib, bizning ezgu ishimizga o'z hissalarini qo'shmoqda. Hozirgi kunda uch xonali uyning poydevori qurib bitkazildi. Ishchi guruh a'zolari mazkur xonadonga tashrif buyurib, qurilishga oid qo'shimcha tavsiyalar berdi.

Iqbol PARDAYEVA

MAKTABDA YOSH JURNALISTLAR TO'GARAGI OCHILADI

O'zbekiston Jurnalistika va ommaviy kommunikatsiyalar universiteti Bosma OAV va noshirlik ishi fakultetining Harbiy jurnalistika yo'nalishi o'qituvchi va talabalari Yakkasaroy tumanidagi 91-ixtisoslashtirilgan davlat umumta'lim maktabida mehmon bo'ldi.

Davra suhbatida Harbiy va sport jurnalistikasi kafedrasini mudiri, katta o'qituvchi Alijon Safarov o'quvchilarga universitetdagi o'quv jarayonlari, talabalar uchun yaratilgan sharoitlar haqida so'zlab berdi. Talabalar abituriyentlik davridagi qiyinchiliklar, o'qishga kirgandan keyingi quvonchlarini bilan o'rtoqlashdi. Maktabda ham jurnalistlar uchun to'g'ri maktab o'chish taklifi bildirildi. Sport sharhlovchisi Davron Fayziyev sharh jurnalistikasi haqida o'quvchilarga ma'lumot berdi.

O'quvchilar o'zlarining qiziqtirgan savollariga javoblar oldi. Faol o'quvchilarga sovg'alar topshirildi.

Mashhura NASRIDINOVA

YOSH KIMYOGARLAR SAMARQANDDA

G'olib HASANOV,
O'ZA muxbiri



Prezident ta'lim muassasalari agentligi tomonidan tashkil etilayotgan 56-Xalqaro Mendeleev kimyo olimpiadasi ishtirokchilari Samarqandda bo'lib, yurtimiz tarixi, xalqimizning boy madaniy merosi bilan tanishdi.

— Xalqaro Mendeleev kimyo olimpiadasi yurtimizda uchinchi bor o'tkazilmoqda, — **deydi O'zbekiston terma jamoasi rahbari Ortiqboy Eshonqulov.** — Bu galgi olimpiadada yigirmaga yaqin davlatdan 100 nafar atrofida o'quvchilar o'z bilimlarini sinab ko'rmoqda. Avstriya, BAA, Isroil, Turkiya, Suriya davlatlarining o'quvchilari ilk bor ishtirok etmoqda. Shu kungacha jamoamiz a'zolari mazkur olimpiadaning 8 ta oltin, 35 ta kumush, 41 ta bronza medalini qo'lga kiritgan. Joriy yil ham 12 nafar o'quvchimiz yurtimiz sharafini himoya qilmoqda.

Ishirokchilar dastlab Amir Temur maqbarasida bo'lib, temuriylar davri tarixi, o'sha davr ilm-fani, madaniy aloqalari haqidagi muhim ma'lumotlarga ega bo'lishdi.

— O'zbekistonda uchinchi marta o'tkazilayotgan Xalqaro Mendeleev olimpiadasida ham ishtirok etish nasib etdi, — **deydi olimpiada hakami, qozog'istonlik Vladimir Shvartsman.** — Yurtingizga bir kelgan kishi yana qayta kelish

orzusi bilan yashaydi. Men har gal O'zbekistonga kelganimda ochiq chehra insonlarini ko'rib o'zgacha kuch, ruhiy ozuqa olaman. Ayniqsa, Samarqandga kelganimda o'zimni ruhan tetik his etaman. Buyuk insonlarga beshik bo'lgan bu zamin har tomonlama insonni o'ziga tortadi. Shu bois yosh kimyogarlarning olimpiada doirasida Samarqand bilan tanishtirilmoqda.

Tashrif davomida ishtirokchilar Registon maydoni, Ulug'bek rasadxonasi, Xo'ja Doniyor maqbarasi hamda Shohi Zinda majmualarida bo'ldi.

— O'zbekistonda o'tayotgan xalqaro olimpiadada qatnashayotganimdan xursandman, — **deydi isroillik ishtirokchi Tall Sason.** — Olimpiadada berilgan vazifalar juda qiyin, ammo biz maroq bilan bajaryapmiz. Tashkiliy ishlar juda puxta, mazmunli uyushtirilgan. Biz faqatgina bahslashayotganimiz yo'q, madaniy tadbirlarda qatnashib, tengdoshlarimiz bilan tanishib, do'stlashaymiz ham. Qolaversa, O'zbekiston bilan tanishaymiz. Dastlab Toshkentning diqqatga sazovor joylarida bo'ldik. Bugun dunyoga mashhur Samarqandamiz. Tarixiy obidalar, go'zal tabiat o'ziga xos taassurot qoldirmoqda.

Xalqaro 56-Mendeleev olimpiadasi 16-maygacha davom etadi.

DAFTARDAGI FUQAROLARGA SUBSIDIYA BERILADI

177 IMKONIYAT



Prezidentimizning 2021-yil 3-fevraldagi "2017-2021-yillarda O'zbekiston Respublikasini rivojlantirishning beshta ustuvor yo'nalishi bo'yicha harakatlar strategiyasini "Yoshlarni qo'llab-quvvatlash va aholi salomatligini mustahkamlash yili"da amalga oshirishga oid davlat dasturi to'g'risida"gi farmoniga asosan, ish-siz a'zolari bor oilalarga, jumladan, "Temir daftari", "Ayollar daftari" va "Yoshlar daftari"ga kiritilgan fuqarolarga dehqonchilik bilan shug'ullanish imkoniyatlarini kengaytirish uchun:

• dehqonchilik bilan shug'ullanish uchun, shu jumladan, yangi o'zlashtirilgan, lalmi, foydalanilmayotgan yer maydonlarida 0,1 gektardan 1 gektargacha yer ajratish;

• ajratilgan yer maydonlari sug'orish tizimi (artizan quduqlar, tomchilatib sug'orish tizimi va boshqalar) hamda elektr energiyasi bilan ta'minlash;

• berilgan yerlarni o'zlashtirish uchun (yer haydash, urug', ko'chat xarid qilish va boshqalar) subsidiya ajratish;

• tadbirkorlik va o'zini o'zi band qilish faoliyatini boshlamog'chi bo'lgan ishsiz, shu jumladan, "Temir daftari", "Ayollar daftari" va "Yoshlar daftari"ga kiritilgan fuqarolarga faoliyatini boshlashda kerak bo'lgan asbob-uskuna, mehnat qurollarini xarid qilish uchun 7 million so'mgacha subsidiyalar ajratish belgilangan.

Imtiyozni taqdim etish tartibi va muddatlari:

Imtiyozli toifalarga mansub shaxslar imtiyozdan foydalanish yuzasidan tuman va shahar Aholi bandligiga ko'maklashish markazlari yoki hududiy sektorlar, fuqarolarning o'zini o'zi boshqarish organlariga murojaat qilishlari mumkin.

Murojaatga talabgorning "Temir daftari", "Ayollar daftari" va "Yoshlar daftari"ga kiritilganligini aniqlashtiruvchi shaxsiga oid ma'lumotlar yoki boshqa tasdiq ilova qilinishi lozim. Mazkur imtiyozlardan foydalanish uchun nomzodlarning yoshi chegaralanmagan.

KREDIT-MODUL TIZIMI:

Mashhura
NASRIDINOVA

QULAYLIK, KAMCHILIK VA USTUN JIHATLARI

O'zbekiston oliy ta'lim muassasalarida "Kredit-modul tizimi joriy qilinadi", degan xabardan ko'pchilik xursand bo'lgan edi. Chunki kredit-modul tizimida ta'lim sifati o'sadi, talabalar o'qituvchi va fanni erkin tanlay oladi. Joriy qilinganiga ikki yil bo'lgan bu tizim O'zbekistonda to'liq ishlayaptimi?

KREDIT-MODUL O'ZI NIMA?

Xalqaro ta'lim tizimida qo'llanadigan akademik kredit tizimi bakalavr, magistr va PhD mutaxassislarining o'zlashtirish darajasini hisoblaydi. Tizimning asosiy maqsadi talabaga boshqa davlatdagi oliy dargohda ham o'qishni davom ettirish imkonini berish. Ammo bu imkoniyatdan o'zbekistonlik talabalar bexabar bo'lsa kerak.

Kredit tizimining bir necha turlari bor. Masalan, Yevropa davlatlarida ECTS (European Credit Transfer and Accumulation System), Amerikada SCH (Semestr credit hours) va Buyuk Britaniyada CATS (Credit Accumulation and Transfer Scheme). Kredit modul tizimi har xil bo'lsa ham, ulardagi kreditlar konvertatsiya qilinganda bir-biriga mos keladi. Ya'ni SCHda ta'lim olayotgan talaba, ECTSda o'qitilayotgan universitetda ham o'qishi mumkin bo'ladi.

O'ZBEKISTONDAGI TIZIM QAYSI?

Dunyo bo'ylab eng keng tarqalgani ECTS bo'lib, O'zbekistonda ham 2020-yildan shu tizimga o'tish boshlandi. Uning ham boshqa kreditlar kabi qulaylik jihatlari bisyor.

ECTS

ECTS - Yevropa mamlakatlari bo'ylab talabalar almashinuvi va erkin ta'lim olishiga imkon beradigan tizim. ECST 1989-yilda Yevropada 145 ta oliy o'quv yurti

hamkorligida qabul qilingan. Bunda bakalavr talabasi bir o'quv yili davomida 60, bitta semestr uchun 30 kredit yig'ishi kerak bo'ladi. Bir kredit 25-30 soat shug'ullanish natijasida yig'iladi. Kreditlar darsdagi faollik, testlar, loyiha va tadqiqot ishlari, og'zaki yoki yozma imtihon baholari kabilarga asoslanadi. ECTS beradigan afzalliklardan yana biri shu tizimda o'qigan talabaning Yevropada ish topishi osonlashadi.

NEGA KREDIT-MODUL TIZIMIGA O'TILDI?

Vazirlar mahkamasining 2020-yil 31-dekabrda "Oliy ta'lim muassasalarida ta'lim jarayonini tashkil etish bilan bog'liq tizimni takomillashtirish chora-tadbirlari to'g'risida"gi qaroriga ko'ra, 2020-2021-o'quv yilidan respublika oliy ta'lim muassasalarida o'quv jarayoni bosqimcha-bosqich kredit modul tizimiga o'tkaziladigan bo'ladi. 2021-2022-o'quv yilidan yurtimizdagi deyarli barcha oliy o'quv yurtlari kredit-modulga o'tadi. O'zbekistonda joriy qilingan kredit tizimi ham Yevropaniki bilan deyarli bir xil. Ammo ba'zi oliy ta'lim muassasalarida ECTSning hamma talabari ham bajarilmayapti. ECTS bo'yicha talaba professor-o'qituvchilarni erkin tanlashi mumkin. Bunda uning qo'lga fanlar va o'qituvchilar ro'yxati beriladi. Professor o'qituvchilarni tanlashda talabalarga tyutorlar yordam beradi.

DAVOMAT TUSHUNCHASI QANDAY?

Kredit tizimida davomat hisobga olinmaydi. Minimal holatda talabaning darsga qatnashishi uchun 15 foiz kredit beriladi. Agar talaba o'sha darsni keyinchalik o'zi yetkazib olishga ishonsa, ma'lum darslarga qatnashmay, mustaqil o'zlashtirib olishi mumkin. Vazirlar Mahkamasida qarorida talabalar


ning o'quv mashg'ulotlarida qatnashishi haqida belgilangan tartib bor. Bir fanga ajratilgan auditoriya soatining 25 foizi va undan ortiq soatni sababsiz qoldirgan talaba ushbu fandan chetlashtirilib, yakuniy nazoratga kiritilmaydi va bu fan bo'yicha tegishli kreditlarni o'zlashtirmagan hisoblanadi. Yakuniy nazoratni topshira olmagan yoki qoniqsiz baho olgan talaba akademik qarzdor hisoblanadi.

BIZDA HAM FANNI TANLASH MUMKINMI?

Talaba kelgusi kasbi, rejalashtirgan ish joyi, faoliyat turiga zarur bilim va ko'nikmalarni hisobga olib, shu fanlarni tanlaydi. Bundan tashqari, talaba unga fanlarni tanlash imkoniyati berilishini talab qilishga haqli. Ammo tanlagan kreditlarini yopolmasa, to'lov asosida qayta o'qiydi.

- Universitetga kirganimda o'qish boshlanishidan oldin qo'limga fanlar va ustozlar ro'yxati berilgan, - **deydi Istanbul universiteti adabiyot fakulteti san'atshunoslik yo'nalishi talabasi Muhabbat Yusupova.** - Misol uchun, bitta fanga A,B,C variantida uchta o'qituvchi beriladi. Ularning darajasi ham bir xil, faqat dars o'tish vaqti har xil bo'ladi. Men o'zingga mos yo'nalishni va qulay vaqt darsni tanlayman. Keyin ustozlar o'qish uchun adabiyotlar beradi. Kutubxonamiz ham qaysidir kitob kerakligini aytib beradi. Haftada uch kun dars bo'ladi. Lekin semestr oxirigacha har bir talaba kreditlarni yopishi kerak. Bunda talaba o'zi ko'proq harakat qiladi.

O'zbekistonda kredit-modul tizimi joriy etilgan bo'lsa-da, ko'pgina ta'lim muassasalarining hamon eskicha shaklda ishlayotganiga guvoh bo'lyapmiz. Albatta, hech narsaga o'z-o'zidan yoki qiyinchiliklarsiz erishib bo'lmaydi. Biroq ta'lim sifati har narsadan ustundir.



"BIRGA O'QIYMIZ!" LOYIHASI G'OLIBI ANIQLANDI

Gazetamizning 23-sonida e'lon qilingan "Birga o'qiy-miz!" kitobxonlik loyihasining 2-soni uchun yo'llangan javoblar orasi dan g'olibni aniqladik!



Samarqand davlat universiteti filologiya fakulteti I-bosqich talabasi **Adiba Abdullaeva** "Kecha va kunduz" romani yuzasidan tuzilgan savollarga birinchilardan bo'lib to'g'ri javob yo'llagan uchun loyihamizning 2-sonida g'olib deb topildi.

Adibani g'oliblik bilan tabriklaymiz. Shu bilan birga, **Sarvinoz Nurmurodova, Behruz Shukurov, Fotima Bahromqulova, Go'zal Sirojova, Mohigul Turdialiyeva, Aim Farmanova, Husnidabonu Hazratqulova, Alisa, Samandar Yusupovga** pochta manzillaridan jo'natilgan javoblari va faol ishtiroki uchun minnatdorchilik bildiramiz!

Loyihaning navbatdagi sonlarida ham faollik ko'rsatgan ishtirokchilarimizni yanada qiziqarli ma'lumotlar va tahririyat tomonidan maxsus sovg'alar kutib turibdi.

"ZAKOVAT" JAZONI IJRO ETISH MUASSASASIDA



Yoshlar ishlar agentligi Namangan viloyat boshqarmasi Ichki ishlar vazirligi bilan hamkorlikda Pop tumanida joylashgan 6-sonli Jazoni ijro etish muassasasida "Zakovat" intellektual turnirini o'tkazdi.

Turnirda muassasada jazoni o'tayotgan yoshlardan tashkil topgan 4 ta jamoa o'zaro bel-lashdi. Yakuniy natijalarga ko'ra, 1-o'rinni "Adolat" jamoasi qo'lga kiritdi. 2-o'rinni "Ozodlik" jamoasi egallagan bo'lsa, 3-o'rinni "Samo" jamoasiga nasib etdi.

Iqbol PARDAYEVA



SO'Z ERKINLIGI NIMA?

YOXUD "QO'Y KO'RMAGAN QO'Y KO'RSA, QUVA-QUVA O'LDIRARMISH"

O'qdimki, bir yig'inda birovning og'zi hech yopilmabdi. Oxirida esa odamlarga qarab: Kechirasizlar, bugun rosa ko'p gapirib yubordim, - desa, biri unga: sen hali hech bir gap aytmadim, - degan ekan.

So'z erkinligi haqiqatni ko'ra bilishda muhim vositadir. Ammo bundan qay tarzda foydalana o'laymiz? So'z erkinligini yaxshi ang'lay o'laymizmi? Ana shu og'riqli nuqta.

Ayni damda axborot almashinuvi shiddatli, tezkor. Ko'plab obunachilariga, o'quvchilariga ega manbalar ortib bormoqda. Ko'pchilik o'shalarining nuqtayi nazaridan axborotlarni qabul qilmoqda.

Xo'sh, olayotgan ma'lumotlarimiz qanchalik haqqoniy, qanchalik ishonchli? Agar ishonchli bo'lsa, unda o'sha manbada bildirilgan fikr qanchalik teran va xolis?! Fikr-mulohazalar bir shaxsning, ko'pchilikningmi?! Ko'pchilikka tegishli bo'lsa, ular kimlar?! Avvalambor, ko'p sonli auditoriyaga ega bo'lganlar har bir nutqiga e'tiborli bo'lishi kerak.


Kuzatuvchilar, obunachilar ko'pligi katta mas'uliyat beradi. Ammo ba'zi blagerlarning "sizlarga nima, istaganimni gapiraman, xohlamaganlar kanalimdan chiqib ketishi mumkin", degan yoki shunga o'xshash mazmundagi gaplariga duch kelamiz. Bu ne demak?!

Muqoyasa qilaylik, bir xonada bir qancha kishilar bor, shurida ularning biri biror hid taratuvchi vosita ishlatmoqchi bo'lsa, xonadoshlarining ham borligini unutmastigi kerak. Boshqalariga salbiy ta'sir qiladigan vositani ishlatib, sizlarga nima, o'zimizni bo'lgach, istagan vaqtim foydalanaman-da, deyishi qanchalar to'g'ri bo'ladi?!

Omma oldida so'z aytilyaptimi, demak, u xolis bo'lsin, o'zgalarga manfaat bersin!

Nega turli shaxslarning ijtimoiy tarmoqlardagi kanallarida turli bema'ni fikrlar, saviyasiz tanqidlar ko'payib qoldi?! Chunki ularning nutqi odamlarga bilvosita yetadi.

Samariddin YO'IDOSHEV,
O'ZLOKU talabasi



Ijtimoiy reklama

O'ZBEK TILINI O'RGATUVCHI DASTUR YARATILADI

"O'zbekiston yoshlar forumi - 2021"da o'zbek tilini rivojlantirish bo'yicha o'z taklifim bilan qatnashgandim. Loyiham mazmuni zamonaviy axborot texnologiyalari va kommunikatsiyalarining integratsiyalashuvini ta'minlash sohasida xorijliklar uchun o'zbek tilini o'rgatuvchi dastur yaratishga qaratilgan.

Asosiy maqsadi o'zbek tilining xalqaro miqyosdagi o'rni va nufuzini oshirish, bu borada xorijiy davlatlar bilan hamkorlikni rivojlantirish, o'zbek tilini jahon tillari miqyosida keng targ'ib qilish hamda xorijda chet el fuqarolari uchun o'zbek tilini o'rgatuvchi o'quv markazlari tashkil etish, o'zbek tilini bilish darajasini aniqlash bo'yicha xalqaro sertifikatni joriy etish, xorijda o'zbek tilini o'rganuvchilarning O'zbekistonga tashrifini tashkil qilish.

Taklifim O'zbekiston Bosh vaziri o'rinbosari, investitsiyalar va tashqi savdo vaziri tomonidan 2022-yil 18-yanvardagi 6-son bayonida ham tasdiqlandi. Hozirda loyiha to'liq ishlab chiqilmoqda. Mazkur loyiha bo'yicha takliflaringiz bo'lsa, **+99899 729 09 63** telefon raqamiga murojaat qiling.

O'g'lioy SAITQULOVA,

Jizzax viloyati Yuridik texnikumi o'quvchisi

TILIMIZNI BOYITYAPMIZMI YOKI...

Har bir tilning lug'at boyligi, ya'ni so'zlari mavjud. So'z bevosita yoki bilvosita borliqni ifodalaydi, jamiyatdagi o'zgarishlarni, xalqning moddiy hayoti va ma'naviy olamini aks ettiradi. Demak, tilimiz bizning qadriyatimiz, milliyligimizdir. Ammo hozirgi kunda tilimizga turli - rus, ingliz, fors-tojik, arab tillaridan so'zlar kirib kelib, ular hech qanday o'zgarishsiz, to'g'ridan-to'g'ri qabul qilinayapti. Bu qanchalik to'g'ri?!

Nega aynan bu mavzuni tadqiq qilish kerak? Chunki o'zbek tili har tomonlama, lug'at jihatidan ham boy til. Nazarimda, boshqa tillardan kirib kelayotgan so'zlarni darrov muomalaga kiritmasdan, uni taftish qilib, aynan shu so'zning o'zbek tilidagi varianti topilsa, maqsadga muvofiq bo'lardi.

Xo'sh, muammo nimada? Muammo shundaki, ularning kirib kelishi o'zbek tilidagi so'zlarning kamayib ketishiga olib keladi. Eng achinarlisi, o'zbek tili lug'ati chet so'zlar bilan "boyiydi", ya'ni o'zbek tili o'z-o'zidan yo'qola boshlaydi.

Ma'lumki, o'zbek tilida ot so'z turkumida eng faol so'z yasovchi *-chi* qo'shimchasi hisoblanadi. Uning ingliz tilidagi muqobil *-er* shakli bo'lib, bu qolip asosida yasalgan broker, vaucher, snayper, trener, taymer, shuningdek, investor, monitor kabi yuzga yaqin leksemalar tilimizga o'zgarishsiz o'zlashgan. Masalan, investor so'zining o'zbekcha muqobili sarmoyador; aysberg - muz tog'i; banket - o'tirish, katta ziyofat; bankrot - singan korxonaga yoki shaxs; bantik - tasma, tugun kabilarning o'zbekcha muqobili o'rniga o'zlashmasi ishlatilib kelinmoqda.

Yana misol tariqasida shuni aytib o'tish joizki, o'zimiz sevib iste'mol qiladigan smrodina, malina, qulupnay so'zlari ham o'zlashma bo'lib, rus tilidan, na'matak so'zi esa arab tilidan kirib kelgan. Ularning o'zbekcha

muqobil variantlari (smrodina - qarag'at, malina - xo'jag'at, qulupnay - yertut, na'matak - itburun tarzida) o'zbek tilida mavjud. Ularning o'zbekcha nomlanishi tilimizda qo'llanmasligi achinarli holatdir.

Maqsad chetdan kirib kelayotgan so'zlarning muqobil variantlarini ishlab chiqish, tatbiq etish va muomalaga kiritishdir. Masalan, Turkiyada chetdan so'z kirib keldimi, uning muqobil variantini topishga harakat qilinar ekan. Hattoki u shevada bo'lsa ham qo'llanar ekan. Turk tilida mashina so'zi arava tarzida ishlatilar ekan yoki o'zbek tilida arab va fors tillarining qorishmasidan o'zlashgan shaxs guvohnomasi, ya'ni ID-karti turklarda "kimlik karti" tarzida ifodalanar ekan. Bu esa ularning tiliga, millatiga bo'lgan muhabbatining yorqin isbotidir.

Xulosa qilar ekanmiz, har bir til unda so'zlovchi xalqning dunyoda borligini ifodalab keladi. Tilimizga bo'yusundirilib emas, balki hokim bo'lib kirib kelgan va kelayotgan so'zlar vositasida lug'at boyishi mumkin. Ammo til o'z-o'zidan yo'q bo'lib boraveradi. Agar o'zbek tilida fikrlashga keng yo'l ochilmas ekan, quloqqa yoqmaydigan, tilimizga mantiqsiz va g'aliz tarjimalar orqali yot so'zlar urchigandan urchib ketaveradi.

Odamlar o'zbekcha ko'rinishimizni qabul qilmay, chet tilidagi so'zlarni aytishi ona tilimiz yo'lga g'ov bo'laveradi. O'zbek tilshunosligini tadqiq etar ekanmiz, tilimizning naqadar boy va rang-barang ekanini ko'ramiz.

Shunday ekan, o'z tilimizni saqlab qolish, uni uzoq yillar xalqimiz uchun xizmat qilishini ta'minlash, xalqaro hamjamiyatga tilimizning imkoniyatlarini ko'rsatish, xalqaro miqyosga olib chiqish uchun biz yoshlar bel bog'lamog'imiz shart va zarur.

Mehrino JO'RAYEVA,

Termiz davlat universiteti o'zbek filologiyasi fakulteti I-bosqich talabasi



O'ZBEKISTON
YOSH FERMERLARI
KENGASHI

O'ZBEKISTON QISHLOQ XO'JALIGINING YORQIN KELAJAGINI BIRGALIKDA YARATAMIZ!

O'zbekiston Yosh fermerlari kengashi nodavlat notijorat tashkiloti o'z oldiga fermerlik faoliyatini keng targ'ib qilish va rivojlantirish, yoshlar, ayniqsa, uyushmagan yoshlarni fermerlik harakatiga keng jalb etish, yosh fermerlarni ko'p tarmoqli fermer xo'jaliklariga aylantirishda ko'maklashish, shuningdek, yosh fermerlar faoliyatida duch kelinayotgan muammolar va masalalarni birgalikda hal etish, xorijiy ilg'or tajribalarni o'rganib, yosh fermerlar faoliyatiga joriy qilishda amaliy yordamlar ko'rsatishni maqsad qilgan.

Yangi loyihalar

Biz yosh fermerlar va fermerlikka qiziqqan yoshlarni qishloq xo'jaligida faoliyatini boshlash va muvaffaqiyatli davom ettirishi yo'lida sohada nomaqbul holatni o'zgartirishga, tarmoqlarni kuchaytirishga, biznes xizmatlar ko'rsatishga va yangiliklar yaratishga qaratilgan loyihalar ishlab chiqamiz va amalga oshiramiz.

Yangi qahramonlar

Biz agrar sohada muvaffaqiyatli faoliyat olib borayotgan yosh agrotadbirkorlarning va mutaxassislarning tashabbuslarini qo'llab-quvvatlaymiz, ularning ovozlari tinglanishiga va g'oyalarning jonlanishiga ko'maklashamiz.

Yangi imkoniyatlar

Biz mamlakatdagi barcha yoshlarga bepul konsultatsiya ko'rsatamiz. Qolaversa, kengashga a'zo bo'lish, tajriba orttirish va uning xizmatlaridan foydalanish mutlaqo bepuldur. Biz O'zbekiston Yosh fermerlari kengashining faoliyatini qo'llab-quvvatlagan barcha ko'ngilli yoshlarni hamkorlikka chorlab qolamiz.



94 442 07 07



/YOSHFERMER

YOSHLAR OVOZI

Bosh muharrir:
**Hamza
ABDULLAYEV**

Muassis:
O'zbekiston yoshlar ittifoqi
Markaziy Kengashi

Bosh hamkor:
O'zbekiston Respublikasi
Yoshlar ishlari agentligi

Navbatchi muharrir:
**Muhammadshukur
MUHAMMADJONOV**

Musahhihlar:
**Rashid XO'JAMOV,
Qirmizoy HAKIMOVA**

Gazeta O'zbekiston Respublikasi Prezidenti Administratsiyasi huzuridagi Axborot va ammiyaviy kommunikatsiyalar agentligida 2020-yil 11-dekabrda № 0242 raqami bilan qayta ro'yxatdan o'tgan. Gazeta materiallari tahririyat kompyuter markazida teriladi va sahifalandi. Tahririyat manzili: 100083, Toshkent, Matbuotchilar ko'chasi, 32. Telefonlar: (7) 233-22-19, (7) 238-79-95.

"Sharaq" nashriyot-matbaa aksiyadorlik kompaniyasi bosmaxonasida, A-3 formatda chop etildi. Hajmi - 2 bosma tabaq. Korxonani manzili: Buyuk Turok ko'chasi, 41. Indekslar: 263, 3203. Bahosi kalishilgan narxda. Buyurtma G-555, Adadi - 10736. Bosishga topshirish vaqti - 21.00. Topshirildi - 20.00.

Saytimizga o'tish uchun QR-kodni telefoningiz orqali skaner qiling.



1 2 3 4 5 6